


En regurdientscha da

16.1.81

1981

## Leci Giusep Giger-Monn, Rueras/Tujetsch



Strusch essan nus arrivai egl onn niev che nus vegnin puspei confruntai cun quella mort che para era en quei onn da puspei far sia runda. Ed aschia havein nus puspei stuiu endriescher la premuratura mort d'in preziau convischin, Leci Giusep Giger da Rueras, morts el spital a Glion.

### Naschientscha ed affonza

Leci Giusep Giger ei naschius a Rueras ils 2 da decembre 1907, e quei sco 8avel affon da 10 fargliuns, dils geniturs Giusep Maria Giger e Tresa Genoveva naschida Giossi. En onns maghers eis el carschius si en quei grond e bi bein puril cun ses geniturs e fargliuns. Siu bab Giusep Maria e sia mumma Genoveva habitavan da l'autra vart dil Pazzola al pei dil pass Lucmagn a Matergia en Val Medel. Gia igl onn 1895 ein els emigrai a Rueras. Ed aschia ein els adina vegni numnai «ils da Medel», mo quei senza vuler far il minim entiert.

### Famiglia e pur

Igl onn 1942, il meins fevrer, ha el astgau menar agl altar sia spusa e futura consorta e cumpogna dalla veta, la giuvna Filomena Monn da Se-drunc. Da quella lètg ein 3 buobas e 3 buobs sorti, in pli taffer che l'auter. Els han adina fatg cun grond plascher il pur. Negina lavur fuva per els

memia greva. Ensem cun siu frar Vigeli – che fuva buca maridaus ed ei adina staus in grond sustegn e bien aug – han els adina engrondiu il bi fatg puril, sco strusch in secund en Tujetsch. Da l'autra vart da Rueras havevan els ina gronda e biala aclia che senumna «Plaun miez». Mintga primavera, cura ch'il bien Leci pudeva ir a Plaun miez, era el enta parvis. Gie quei era veramein in paradis. La primavera vargada ha el aunc baghegiau entuorn sia casa paterna a Rueras, ed oz secatta quella en vestgiu niev. Il preziau defunct ha schau muncar nuot per sia carezada famiglia. Ed el astgava dir cul poet: «Quei ei miu prau – quei miu clavau – quei mes affons». Ed aschia ha el tratg si ses 6 affons en tema da Diu, cun oraziun e lavur.

### Cruschs e quitaus

Igl onn 1958 ha ina greva frida tuccau nies preziau defunct. In fegl da 13 onns che fuva ad alp en Curnera vegn purtaus a casa sco bara. Bein trestas uras per geniturs e fargliuns. Mo era cheu eis el staus ferms e detg: «Miu Diu, Tia veglia davanti e buca la mia.» Quei ei bein plagas che migliuran plaun e forsa mai. Il Leci fuva in fetg grond um. Bein ha el sia veta tuschiu, mo quei haveva da muntar nuot. Ils 10 da schaner 1975 ha el stuiu schar ir sia carezada consorta tiel Segner. Quellas fridas han alura era pudiu quei umeneri, ed in schar encrescher ha mudergiau nies preziau defunct.

### Sera dalla veta

Plaunet ha el surschau il fatg a ses dus fegls, in era maridaus. Cul fegl Giusep tuccava ei da far il percasa e tuttas autras lavurs da pur. Gia la stad 1980 ha il Leci Giusep entschiet a pusignar. In mal las combas ha sfurzau el da serender ils 14 da decembre 1980 a Glion el spital. Sia davosa ura haveva in auter gia preparau ed ordinau. Ils 5 da schaner ha el returnau si'olma a siu scaffider. Ed ils 7 da schaner han ins surdau siu tgierp alla fossa benedida. Allas famiglias en malencurada siegi condolau da cor. Ed al preziau Leci Giusep giavischein nus il sogn ruaus.

G.F.